

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренцијски савјет*

## **ZAKLJUČAK**

**o obustavljanju postupaka pokrenutog na osnovu Zaključka o pokretanju postupka po službenoj dužnosti za ocjenu koncentracije između Banke Domžale i CBS Bank Sarajevo**

Sarajevo  
Decembar 2006. godine



Broj: 01-06-26-016-9-II/06  
Sarajevo, 22.12.2006. godine

Na osnovu člana 25. stav (1) tačka e), člana 42. stav (1) tačka g), a u vezi sa čl. 12., 14., 15., 16. i 18. Zakona o konkurenciji («Službeni glasnik BiH», broj 48/05) i čl. 210. i 122. stav (4) Zakona o upravnom postupku («Službeni glasnik BiH», broj 29/02), a po Zaključku o pokretanju postupka po službenoj dužnosti između privrednih subjekata Banka Domžale d.d., Domžale, Ljubljanska 62, Domžale, Slovenija i CBS Banka d.d., Sarajevo, Džidžikovac 1, Sarajevo, Bosna i Hercegovina, broj: 01-06-26-016-II/06 dana 26.10.2006. godine, Konkurencijsko vijeće na 38. sjednici održanoj dana 22.12.2006. godine, donijelo je

### **ZAKLJUČAK**

1. Obustavlja se postupak pokrenut na osnovu Zaključka o pokretanju postupka po službenoj dužnosti za ocjenu koncentracije između Banke Domžale d.d. Domžale, Ljubljanska 62, Domžale, Slovenija i CBS Bank d.d., Sarajevo, Džidžikovac 1, Sarajevo, Bosna i Hercegovina.
2. Ovaj zaključak je konačan i biće objavljen u «Službenom glasniku Bosne i Hercegovine», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće je dana 09.05.2006. godine zaprimilo Prijavu namjere koncentracije od strane NLB Tuzlanske Banke d.d. Tuzla u kojoj se navodi namjera koncentracije pripajanjem CBS Bank d.d. Sarajevo sa sjedištem u Sarajevu, Džidžikovac 1, Tuzlanskoj Banci d.d. Tuzla, sa sjedištem u Tuzli, Maršala Tita 34. U toku postupka ocjene dopuštenosti navedene koncentracije, Konkurencijsko vijeće je utvrdilo da je Banka Domžale d.d. Domžale (u daljem tekstu: Banka Domžale), kao jedan od dva većinska vlasnika CBS Bank d.d. Sarajevo (u daljem tekstu: CBS), u martu 2006. godine postala jedini vlasnik dionica CBS i ta koncentracije nije prijavljena Konkurencijskom vijeću.

U cilju ocjene predmetne koncentracije, Konkurencijsko vijeće je donijelo Zaključak o pokretanju postupka po službenoj dužnosti, broj 01-06-26-016-II/06 od 26.10.2006. godine, u skladu sa čl. 27. i 32. Zakona o konkurenciji (u daljem tekstu: Zakon), radi ocjene koncentracije u smislu člana 16. odnosno 18. Zakona.

CBS Bank d.d., Sarajevo, je dioničko društvo sa sjedištem u Sarajevu, Džidžikovac 1, koja pod ovim nazivom posluje od jula 2003. godine. CBS je osnovana 02.12.1993. godine i upisana je u sudski registar Višeg suda Sarajevo pod brojem: UF/I-1782/93 02.12.1993. godine. Dana 20.12.2000. godine u CBS ulazi prvi strani ulagač – Banka Domžale d.d., Domžale, Slovenija kada Banka mijenja naziv u Commercebank d.d. Sarajevo, Grupa Nove Ljubljanske banke.

Promjena dioničara je upisana kod Kantonalnog suda Sarajevo pod brojem: UF/I-4987/00 od 21.12.2000. godine. Kupovinom dionica CBS od strane LHB Internationale Handelsbank AG Frankfurt, mijenja se vlasnička struktura, što je izvršeno upisom kod Kantonalnog suda Sarajevo pod brojem: UF/I-1718/01 od 21.12.2001. godine. Ugovorom o istupanju iz reda dioničara i povećanju udjela kapitala jednog dioničara kupovinom dionica između dioničara Commercebank d.d. Sarajevo od 18.10.2002. godine, CBS je postala dioničko društvo sa 100% stranim kapitalom i to: Banka Domžale d.d., Domžale, Slovenija i LHB Internationale Handelsbank AG Frankfurt, SR Njemačka.

Banka Domžale d.d. Domžale i LHB Internationale Handelsbank AG Frankfurt su dana 23.03.2006. godine zaključile Ugovor o kupovini dionica, kojim je Banka Domžale od LHB Banke otkupila sve dionice CBS Bank d.d. Sarajevo. Prije provođenja navedenog ugovora, dioničari CBS su bili Banka Domžale d.d. Domžale sa 40% udjela u dioničkom kapitalu i LHB Internationale Handelsbank AG Frankfurt sa 60% udjela u dioničkom kapitalu. Rješenjem Agencije za bankarstvo Federacije Bosne i Hercegovine broj: 04-3-1183-1/05 od 24.02.2006. godine, Banka Domžale je dobila saglasnost za povećanje udjela u dioničkom kapitalu sa 40% na preko 66,70% u CBS. Na osnovu zaključenog Ugovora o kupovini dionica, kupoprodaja dionica je realizovana preko Sarajevske berze dana 07.04.2006. godine čime je Banka Domžale d.d. Domžale postala 100% vlasnik svih dionica CBS.

Nova Ljubljanska banka d.d. Ljubljana, Slovenija ima udio od 65,98% dioničkog kapitala Banke Domžale d.d., Domžale. Takođe, Nova ljubljanska banka d.d., Ljubljana je većinski vlasnik LHB Internationale Handelsbank AG Frankfurt sa 56,01% dionica.

Uvidom u dostavljenu dokumentaciju je utvrđeno da je Nova Ljubljanska banka d.d., Ljubljana većinski vlasnik Banke Domžale d.d., Domžale i LHB Internationale Handelsbank AG Frankfurt, te se ne radi o koncentraciji u smislu člana 12. Zakona nego o promjeni vlasničke strukture unutar NLB Grupe, tako da Nova ljubljanska banka d.d., Ljubljana i dalje ostaje većinski vlasnik CBS.

Iz naprijed navedenih razloga Konkurencijsko vijeće je odlučilo kao u dispozitivu ovog zaključka.

**Pouka o pravnom lijeku:**

Protiv ovog zaključka nezadovoljna stranka može pokrenuti upravni spor pred Sudom Bosne i Hercegovine u roku od 30 (trideset) dana od dana prijema ovog zaključka, odnosno od dana njegovog objavljivanja.

**Predsjednik**

**Gordan Raspudić**